

小

腆

紀

傳

小腆紀傳卷第五十五

前翰林院檢討加詹事府贊善銜六合徐鼐撰

列傳第四十八

文苑

艾南英

章世純
羅萬藻

張采

李世熊

紀文疇

子許國 保國

錢秉鐙

嚴 焯

王宏撰

徐夜

補

屈大均

陳恭尹
補

艾南英字千子東鄉諸生於學無所不窺萬厯末場屋文腐爛南英深疾之與同郡章世純羅萬藻陳際泰以興起斯文爲任刻四家文行之世世人翕然歸之稱爲章羅陳艾天啓

甲子舉於鄉對策有譏刺魏忠賢語停三科崇禎時會試久
不第而文名日高與翰林錢謙益相應和排詆王李鍾譚不
遺餘力乙酉南都陷益王由本起兵建昌南英與族人艾命
新集諸紳招劉琦楊獨龍僧丹竹等三十六將就家插血訂
盟分陴拒守事敗走閩陳十可憂疏隆武帝召見授兵部主
事尋改御史汀州之變抑鬱死南英肯任事而負氣陵物嘗
與雲間陳子龍論文南英主先秦西漢子龍主東漢至攘臂
相詈與周鍾以名相忌隆武二年鍾之友人湯來賀以運餉
擢侍郎南英遷怒劾之人謂其褊四家中惟際泰早卒世純
字大力臨川人舉天啓辛酉鄉試崇禎中官柳州知府年已
七十矣聞京師變悲憤成疾死萬藻字文止亦臨川人天啓

丁卯舉於鄉崇禎中行保舉法祭酒倪元潞以萬藻應詔不就宏光時官上杭知縣隆武帝立擢禮部主事哭南英而殯之數月卒

張采字受先太倉人與同里張溥號婁東二張采中崇禎戊辰進士溥亦以歲貢生入都名噪公卿間已采官臨川知縣溥以辛未成進士改庶吉士乞假歸集名士結復社交遊日廣聲氣通朝右所品題頗能爲榮辱執政惡之里人陸文聲輸資爲監生求入社不許又嘗以事爲采所辱詣闕言溥采倡復社亂天下溫體仁方柄國下所司提學道倪元珙兵備馮元颺知州周仲連言復社無可罪奉嚴旨貶斥蘇州推官周之夔刑部侍郎蔡奕琛先後訐溥并及采結黨亂政詔責

溥采回奏溥已前卒采上言復社非臣事然臣與溥生平相
淬礪死避網羅負義圖全誼不出此念溥日夜解經論文矢
心報稱曾未一日服官懷忠入地卽今嚴綸之下并不得泣
血自明良足哀悼是時體仁已罷周延儒再相方求解於東
林疏上事卽解采才名亞於溥溥性寬泛交博愛采特嚴毅
喜甄別可否人有過輒面斥之知臨川時摧強扶弱聲大起
移疾歸士民泣送載道家居時知州劉士斗錢肅樂嚴重之
以奸蠹詢采片紙報咸置之法宏光時起禮部主事進員外
郎時庶務草創徵文議禮頗有功乞假去南都失守奸人銜
采者羣擊之死復錐刺之已而逃避之鄰邑又三年卒

李世熊甯化人字元仲號寒支子博覽載籍爲文雄峭淒麗

久困諸生隆武時大學士黃道周都御史何楷禮部侍郎曹學佺交章薦其異才博學徵拜翰林院博士趣赴廷試世熊疏辭曰臣奉旨顛悸背汗流踵臣髫年在泮九躋場屋鼯鼠之技敗露盡矣非有秘韜潛德遲久俟今乃彰也陛下徇三臣之過舉意僮傭爲異才是恃薦舉爲得烏之羅也臣愚以爲薦舉匪人臣其一矣由臣例之滔滔皆是也敢爲陛下歷陳之可乎陛下登極恩詔一款每縣舉眞才三人臣謂天下中人多而異才寡鄧馮寇賈天下無二三也況一邑乎若鄉曲愿人無裨緩急何取每縣三人充斥仕路哉自臣所見郡邑舉士蓋有目不識六籍而冒以宏博之科夢未見七書而獎以孫吳之略者學官以頽墮之年識趣卑汙士子以蠅蟻

之情黃廬走竇其整身方潔骨氣冰稜守令聞名而不識面者雖老死牖下無緣登薦剡也如是則舉者不才才者不舉臣以爲郡邑薦舉可廢矣至於藩王閣部院寺臺省監司方面各有薦士非瑣瑣嫺嫺則紈褲子弟也非眯目素封則走室神棍也今仕籍自欽授特簡外文臣如試主事試中書司務博士試推官通判知縣不下數百人武臣如總副參遊都司守備不下數百人此千數百人爲陛下撫流民核軍實者誰乎爲陛下靖山海清畿甸者誰乎是千數百人如虛無人也紛紛差遣徒耀飾輿馬煩苦驛卒大字名刺投謁嫺鄰誇炫市里而已自奉命以迄復命逐塵途者臣不知所行何事也亦苟完套格耳原若輩之始進也酬薦主有例酬部覆有

例千數百人非數十萬賂不濟也則是朝廷失數十萬金錢之實而得千數百無用之蠹也虧損國靈孰逾於此乎且非徒損國靈也又壞人心爲士者習見故所等夷猥瑣庸關胸不能知古今成敗口不能道當世利弊一旦冠蓋赫然易如反掌於是富者由徑納賂貧者違言上策盡棄本業而囂然有掇拾軒冕之思蓋自是士不安爲士矣爲民者習見屠酤僕隸訟師優卒遊手失業之徒手不挽強股不跨鞍目不識丁一旦被服金紫頭角頓異以爲錦繡猶斂衽也亦各盡棄本業而囂然有攘竊節鉞之意蓋自是民不安爲民矣士不安爲士則士不可治也民不安爲民則民不可理也下犯上賤陵貴利破義良心泯喪蕩檢踰閑則此官爲之俑也且非

徒壞中人心又以絕豪傑之路夫鰥鰥所餌蛟龍不染其
綸鴟爲所嗜鵠雖不嚇其臭尾瑣者冒進而破毀廉隅俊雅
者必迴翔而護持方隅也不識廉隅雖狗竇容身以爲榮自
負方隅卽一歲九遷以爲辱也昔者崔浩欲屈哇夸爲中郎
夸曰桃簡已爲司徒何足以此煩國士矣國士之不忍俯同
世士也雖以崔浩之才哇夸猶羞與爲伍也臣安知邱隴之
下無泥塗軒冕之士乎夫圭璧所以寶者爲採之甚難售之
甚鉅也若圭璧與瓦礫同致無爲寶圭璧矣軒冕所以榮者
爲責任甚重大賢才甚希貴也令軒冕與草屨同掇無爲貴
軒冕矣今陛下有網絡英雄之事而諸臣爲杜拒英雄之事
則薦舉之名爲奸貪藉口也牛驥同廐朱粉雜糅欲使奇士

策杖攀附翼麟猶以敝冠招由光賫財享曾史也他不具論
臣舉其大者永甯王招降閭總屢立戰功及糧匱援絕身陷
敵營生死之義備矣陛下追念前勳錫以茅土誓如山河足
瞑忠魂至其逃將潰卒如謝某舒某各保首領鼠竄偷生自
去年除夜主臣相失至今二三月尙不知藩主存亡何似臣
謂此數人者皆永甯之僇人也軍法隊長戰沒通伍皆斬況
失封疆陷主將尙敢哆口恢復偃然自敘其功乎陛下卽委
曲使過貸其誅夷必俟少立微功乃酬官職然亦及其身而
已今乃呼朋引類每潰將一疏輒題敘多人此何爲乎且題
敘之人果係同患同讎猶可言也今所援引者非無賴之青
衿卽市井之錢虜夙昔無澤袍之義因緣藉使鬼之錢不加

考課逕敘清華臣以爲賞罰倒置斯爲極矣昔館陶公主爲子求郎漢明帝不與而賜錢千萬以戚主爲子求郎而不得以逃將爲市奸乞清華而得之何古人名器之重而今獨輕乎如謂假章服之虛榮爲招徠之實策臣愚以爲戀棧而來者必非駿馬鑽穴而從者必無佳士即使人才甚乏邊疆甚迫當旁求耿介特立廉幹有識之士而用之奈何使譸張無信進身不端者連苞引擘以穢朝廷乎臣又舉其大者古者三公不備惟其人高皇帝罷設丞相閣臣不得稱相也仁宣之代猶與卿並自天順之隆而相端萌矣嘉靖人紹歸政內閣三輔鼎承百辟風偃蓋自是儼然宰相矣今猶昔也然卒未有綸扉之地得參十數席者今陛下龍飛一載而內閣已

三十人後此萬年無疆兩京光復時會方來矣英賢踵至枚
卜殆將踰於今者是一代之間宰輔幾百人矣書之史冊將
爲駭怪夫王者設官上法乾象今三台六星上相次相四星
卽位十五星亦王官所取儀矣宰輔下天子一等宰輔尊而
後天子亦尊若以調變陰陽之司下同錢穀刑獄之瑣則三
台斗柄亦已陵遲矣何以爲巍巍帝座乎田千秋一言取相
而夷狄以爲笑譏公孫宏曲學阿世而淮南比之蒙落蓋相
臣之難稱任久矣是以公孫涕泣不受詔李鄦引疾不視事
誠知責任重大受祿易誣也今陛下聖神文武贊協殊難而
諸臣受爵不疑有如一德然卒未進於古方召張吉之流爲
陛下歌江漢常武者是草茅所竊疑也臣聞敷陳以言明試

以功車服以庸此聖帝明王磨礪天下之善物也明試言功則僥倖車服者息輕褻車服則誕慢言功者來臣無遠引聖隆魏武亦近古之豪也功如荀彧封不過亭侯愛如倉舒贈不過別部司馬永嘉之末遷王導輔國將軍導曰今天官混雜朝野頽毀導不能崇峻山海而開道亂流謹送還鼓蓋加崇之物元帝從之陶侃既平襄陽拜大將軍劔履上殿侃固讓曰羣醜雖芟大敵未殄有如仗國威靈梟雄斬勒則又何以加曹彬已下江南宋祖曰本授卿使相但劉繼恩未下姑少待之惟賜錢五十萬假令有荀彧王導陶侃曹彬者陛下當以何官酬之乎鄧禹杖策從龍最先諸傑天下粗定乃封高密馬援遨遊二帝側足輕重及米圖山谷勸帝伐蜀猶未

拜將軍也假令從龍以飛者動如高密越疆而歸者智如伏
波陛下又以何官寵之乎李泌有言以官賞功有二患非才
則廢事權重則難制夫官以賞功尙猶有患況於一籌莫展
尺土未恢而宰輔連肩侯伯接踵他日有折衝千里之留鄴
恢復兩京之郭李不知陛下又何以待之是又草茅所竊疑
也臣聞人主之職務在知人而已任各當材雖不親細務大
功可成用違其器雖衡石程書無益於治也夫治國猶治家
然主一家者必有亞伯旅疆耕以責奴織以責婢而後一家
之事集主天下者必有心腹股肱內參機密外戡禍亂而後
天下之業成今爲陛下心腹者有乎股肱者有乎相不敢望
管葛庶幾王導謝安李綱趙鼎之儔將不敢言韓岳庶幾劉

琦孟珙之輩臣賤微狂瞽何敢輕量天下士但觀登黜人才
區畫戰守之間未知於前人何如耳宋儒有言將帥之才卽
不可得當於搢紳廉幹有識中求之又云直言敢諫之士卽
仗節死義之臣斯兩言者亦觀人之要論矣臣觀諸他途營
進負鼎翹關者必荏苒僉人非骨鯁魁壘之端士也諸論持
兩端應機不斷視蔭拱默者必蓄縮憤夫非駿雄制變之寶
臣也若夫頭角誇誕類於剛武銳口縱橫類於智略撫膺灑
泣類於忠誠而推測星緯妄談吉凶搖惑視聽者又類於神
明不測臣觀諸險躁浮游性無關鑰語無歸宿者誤天下蒼
生必是人而易於聳動人主亦是人也臣願陛下之慎簡也
李綱曰用人如用藥必知其術藥可以已病乃可使之進藥

而責成功今不知其術業而姑試之則雖日易一醫無補於病徒加疾而已今臣自知駑劣迂疎無濟緩急而薦臣者以爲可用陛下亦信爲可用是不知臣之術業不能已病也臣妄意陛下以過信臣者過信天下之將相紳衿也故不敢避斧鉞連類妄言之伏乞免臣廷試長擯草茅臣韋索茹草甘同鼎鼐若冒覲嗜進顛蹶隨之生與營苟同汗沒不可見輔臣道周於地下惟陛下許臣幽棲以塞倖竇焉疏拜於二年七月二十日而閩疆旋陷世熊自是杜門絕迹我郡帥遣某生移書逼之謂不出山且有不測之禍世熊復之曰天下人無官者十九豈盡高士余年四十八矣何能抑情違性重取羞辱哉辛卯壬辰間建昌潰賊黃希孕掠泉上里有卒摘寒

支園中二橋希孕立鞭之駐馬園側視卒盡過乃行粵寇燔民屋火及寒支園其魁劉大勝遣卒撲救曰奈何壞李公居室耿精忠之反也僞使絡繹敦聘世熊堅臥不赴自春徂冬乃免年八十五卒於家著有寒支集甯化縣志錢神志史感物感本行錄經正錄各若干卷

紀文疇字南書同安人爲諸生有聲興泉道王猷館之署焚香讀易口不及官府事與子許國從黃道周於鄴山隆武時道周薦其博學多才授中書舍人擢翰林院待詔纂聖安實錄閔亡挈家渡海從朱成功復同安城陷以勞瘁死所著史勺三卷道周謂其論核古昔上下三千年疑難反正盡之矣華亭徐孚遠序其湄龍詩文集以黃紀比歐蘇以許國兄弟

比文忠文定時人謂不愧云許國字石青文疇長子年十六
爲諸生從父聽講鄴山弟子二百餘人許國最少黃道周許
以掉臂獨行贈之詩曰蒼茫千古留石青不與世界爭零星
著有丁史焦書數卷崇禎壬午舉於鄉爲臨川揭重熙所得
士與同榜林說林尊賓有三異人目著有同岑草一帙北都
變有望燕吟一卷後從父避居廈門沈宸荃薦於魯監國授
禮科給事中不就路振飛薦之永厯帝以道阻不果行朱成
功欲致之幕府亦不屈與流寓諸公脫粟烹菽相對歛歔
爲詩文以傳之所遺吾浩堂詩文集同里林霍爲之序保國
字安卿文疇季子幼隨父兄避居廈門及長取父兄所著書
閉戶編輯旣乃僧裝遊五岳不知所終


錢秉鐙字幼光後改名澄之字飲光桐城人嘗學易於黃道周宏光時馬阮興大獄秉鐙名在捕中變姓名逸去南都亡走閩中道周薦授推官秉鐙以薦舉得官爲恥請候鄉試不許閩亡自江南入粵永曆三年臨軒親試授庶吉士南雄陷倉卒移蹕凡大詔令悉秉鐙視草金堡下獄營救之大學士王化澄因側目將改爲職方主事嚴起恆持不可且言秉鐙有制誥才乃改編修管制誥鄭國公高必正與平侯黨守素之朝於梧州也吳貞毓郭之奇郊迎四十里欲藉以殺五虎逐起恆適秉鐙過戎政侍郎劉遠生舟必正等先在日舉朝人皆說嚴公不好想不是好人秉鐙曰公見過幾人必正曰過半矣秉鐙笑曰爲要說嚴公不好故見公耳若某便不來

矣且說嚴公不好者爲救五虎也五虎攻嚴公而嚴公反救五虎公以爲何如平必正大感悟曰君言是也然如孔子也就沒人參他秉鐙曰孔子到齊國被晏子參到楚國被子西參必正大喜曰原來孔子也有人參及入對力言起恆公忠無私金堡處分過當事得解秉鐙又疏言之乃改戍堡清浪衛尋因病乞假至桂林桂林陷祝髮爲僧名西頑久之返里所著有易學詩學藏山閣稿田間集所知錄

嚴煒字伯玉常熟人大學士訥之孫也初爲邢陽王某客繼入何騰蛟瞿式耜幕授光祿寺卿見時事日非隱平樂之回仙洞庚寅冬

王師克桂林下平樂跡前大學士方以智庶吉士錢秉鐙於

其家不可得則縛煒掠之我大帥馬蛟麟諭之降不可脅以刃誘以冠服並不答乃改容禮之聽其以僧終嘗省母一還里門晚仍入回仙洞以終著有滄浪集其妾鄒淑芳字蕙祺吳江人亦能詩從煒轉徙楚粵年二十四而天有詩百五十首題曰三生石草病革自焚之

王宏撰字無異號山史華陰諸生兵部侍郎之子嗜學收藏古書畫金石最富著易象圖述及山志砥齋集關中人士之領袖也

國朝康熙戊午以鴻博徵不赴初與李因篤同學甚密及因篤就徵遂與之絕顧炎武嘗曰好學不倦篤於朋友吾不如王山史卒年七十五

徐夜初名元善慕嵇叔夜之爲人更名夜字東癡山東新城人束髮能詩年二十九遭國難母死棄諸生遠遊歸隱居東臯鄭潢河上堀門土室絕跡城市有朱桃稚杜子春之風遺老如顧炎武張光啓諸人皆訂交焉我

朝舉博學鴻詞不赴王士禎嘗索其藁遜謝而已後渡潯陽藁盡歿於水土禎爲撫拾遺詩得二百首年七十二歿於柴

桑補

屈大均字介子一字翁山番禺諸生初名紹隆遇亂爲僧後加冠巾遊秦隴與秦中名士李因篤輩爲友作華岳百韻固原守將見而慕其才以甥女妻之自固原攜妻至代州與顧炎武朱彝尊遇於太原再遊京師下吳會自金陵歸粵嶺南

詩人三大家則大均與陳恭尹梁佩蘭也恭尹字元孝順德人兵部主事邦彥子邦彥殉難恭尹才十餘歲比長遂隱居不仕自號羅浮布衣爲嶺南三大家之首秀水朱彝尊嘗云恭尹稍降志辱身然終在逸民之列云補

男承禮編輯

仁和魏錫曾參校
會稽梁繼元覆校

小腆紀傳卷第五十五終

小腆紀傳卷第五十六

前翰林院檢討加詹事府贊善銜六合徐璠

列傳第四十九

遺臣一

孔貞運

賈必選

吳甦

王心一

申紹芳

黃孔昭

沈之琰

陸坦

許譽卿

黃翼聖

邱上儀

張鹿徵

孫宗岱

錢龍錫

陳啓新

倪嘉慶

孫自脩

方孔昭

吳有涯

薛奕

李延是

方震孺

葉廷秀

陳濟生

李世祺

鄭三俊

金光辰

姜琛

周岐臣

李延是

范復粹

曹瑋

李長庚

周堪廣

文士昂

陳所聞

羅楨

張聖型

張聖域

米助國

余鵬翔

于斯力

劉瑄

郭都賢

文燠

陶汝照

奇瑄

潘應斗

弟應星

管嗣襄

孔貞運句客人至聖六十三代孫也萬厯己未以殿試第二

人授編修崇禎元年擢國子監祭酒進少詹仍管監事二年

正月帝臨雍貞運進講書經孔氏子孫以國師進講者自唐

孔穎達後至貞運乃再見賜一品服尋以艱歸六年服闋起

南京禮部侍郎越二年遷吏部左侍郎九年六月入閣以庇

復社與首輔溫體仁相忤不敢有所建白及爲首輔乃揭救

鄭三俊錢謙益俱寬擬後以事爲御史郭景貞所劾乃引歸

十七年五月烈皇帝哀詔至哭臨慟絕不能起舁歸得疾遂卒

賈必選字徒南上元人萬曆己酉舉人官戶部主事筦西新倉時巨璫總理兩部必選黜陋規無所染璫爲歛迹同官倪嘉慶以屯豆下獄必選辨其冤謫九江幕遷桂林推官升南工部虞衡司丁艱歸卽杜門講學著書年八十七始卒

吳甡字鹿友揚州興化人萬曆癸丑進士由知縣入爲御史天啓中忤璫削籍崇禎初起故官按河南妖人聚徒劫掠捕其魁誅之賑延綏饑民因諭散賊黨按陝西劾大將杜文煥冒功罪置之法所請皆允行遷大理寺丞進左通政七年擢右僉都御史巡撫山西扼河防秦豫連三歲無一賊潛渡築

邊牆免殘破州縣租誅降賊之自恣者而免脅從於死晉人
戴如慈母謝病歸十一年冬起兵部左侍郎遲不至落職閒
住十三年冬起故官協理戎政帝嘗問京營軍何以使練者
皆精汰者不譁甞請行分練法問別立戰營否甞言練兵法
要在選將法忌紛更不必別立戰營也十五年六月擢禮部
尙書兼東閣大學士甞有幹濟才而趨避任術初周延儒以
馮銓力再相謀藉捐賑復銓冠帶公議大沸馮元鸞爲甞謀
說延儒引甞共爲銓地甞遂得柄用及延儒語銓事則言逆
案不可翻延儒始知爲所紿又欲起張捷爲南京右都御史
引錦衣都督賂養性甞皆持不可以此積不相能十六年春
三月楚疆大壞帝召對廷臣隕涕謂甞往督湖廣軍甞請精

兵三萬自金陵趨武昌帝言兵多難驟集南京隔遠不必退
守姓言左良玉跋扈甚於往時臣節制不行徒損威重南京
在下流宜兼顧非退守也督撫無兵臣束手待賊事機有不
忍言者帝欲姓速行而難於發言命兵部發兵則無可調姓
不得已以五月辭朝詔責其逗遛命輟行人直姓惶恐引罪
歸帝怒不已遣戍金齒南京兵部尙書史可法疏救不許南
都立赦還復秩吏部尙書張慎言議召用姓爲勛臣劉孔昭
所阻詳慎言等傳姓嘗自言遠追微箕狂遁之迹終矢龔謝
病臥之心懷守歲寒歸覲君父又言以谿堂爲大窖膳薪爲
礪雪冠履爲漢節久之卒

王心一字純甫吳縣人萬厯癸丑進士由行人擢御史天啓

元年詔給客氏土田二十頃爲護墳香火貲魏進忠侍衛有功竝陵功敘錄心一抗疏言陛下眷念二人加給土田明示優錄恐東征將士聞而解體況梓宮未殯先念保姆之香火陵工未成強入奄侍之勤勞於理爲不順於情爲失宜不報已給事中侯震暘發客氏罪狀被謫心一論救並坐貶廷臣請召還者十餘疏尋以皇子生復官累擢刑部侍郎宏光時起原官無所建白南都亡微服遁久之卒

申紹芳字維烈長洲人萬厯丙辰進士由應天府教授陞部郎出爲山東按察副使累官戶部右侍郎宏光時起原官僧大悲之獄詞連紹芳及錢謙益二人疏辨獲免

黃孔昭字含美吳縣人崇禎癸酉舉人知大姚縣粵亡子向

堅走萬里尋之御以歸吳中好事者編爲傳奇有石衣翁南
歸草其紀述多野史所未詳者時同邑沈之琰字琬倩崇禎
中內閣辦事中書有退菴遺藁

陸坦字履長嘉定人崇禎庚午舉人授南豐知縣不赴隱居
鄧尉山有庚除詩藁又太倉黃翼聖字子羽崇禎中以徵辟
授新都知縣升安吉知州國變後棄官歸杜門謝客有蓮蕊
居士詩選

邱上儀字維正武進人由武進士授海鹽衛游擊居官甚廉
或告之曰將者知信仁勇嚴不聞以廉取一介亦何傷笑弗
答亂後躬耕紫雲山麓有盜劫客舟上儀毅然射之百步外
中盜目乃遁舟人詣謝亦不見又嘗負薪三百斤行山中汎

兵欲奪之盡爲所縛兵乞哀縱之去平居恂恂若文士龍山
祝眉老集隱君子十四人計其齒盈千齡目曰千齡社上儀
與焉詩成以上儀爲第一云又張紀字齊方崑山人承蔭錦
衣衛所千戶國變後掛冠歸有概菴集

張鹿徵字瑤星應天人都督可大子也鹿徵生時園中鹿亦
產子故可大名之以府學生承蔭厯錦衣衛正千戶甲申陷
賊受掠逃歸隱居攝山自號白雲道者著述甚富有古鏡詩
內外集玉光劍氣集謏聞正續筆歿後多不傳

孫宗岱六合諸生中書舍人國敕子也國敕以文翰名重京
師宗岱與弟汧如世其學時號爲小三蘇崇禎中宗岱投筆
應薦爲游擊擢參將明亡隱居賣藥以終

許譽卿字公實華亭人萬厯丙辰進士由推官徵拜吏科給事中疏論魏忠賢大逆不道鐫秩歸崇禎中起兵科給事中而閹黨王永光薛國觀許譽卿爲東林主盟結黨亂政譽卿疏白卽引去七年起故官厯工科都給事中明年流賊燬鳳陵譽卿憤詆本兵張鳳翼閣臣溫體仁王應熊玩寇速禍且曰皇上法無假貸獨於誤國輔臣不一問乎卒不聽尋以資深當擢京卿吏科謝陞希體仁意出之南京大學士文震孟不平之語侵陞陞亦怒疏攻譽卿營求北缺不欲南遷爲把持朝政地遂削籍言官交薦不用宏光時起光祿卿平湖監生陸濬源爲兄兵部員外澄源訟逆案冤阿馬阮旨牽涉三案并詆譽卿譽卿疏辨曰諸臣以翊戴皇上爲正均從倫序

起見耳光廟母子無間先帝身殉社稷何嫌何疑而小人無端播弄假手濬源皇上追削溫體仁諡萬口稱快濬源乃頌其平章之功甚矣若輩之黨奸欺上也大鉞益怒將興大悲獄指爲五十三參之首國變後祝髮爲僧久之卒

陳啓新山陽人崇禎九年以武舉詣闕上書言科目之病資格之病行取考選之病大旨以破格用人動上稱旨立擢吏科給事中然啓新條奏率無關大計御史王聚奎劾其溺職帝怒謫聚奎久之御史倫之楷劾其請託受賕還鄉驕橫詔行勘未上而啓新遭母憂給事中姜燠復極詆之削籍追賊啓新逃去跡之不獲國變後爲僧以卒

倪嘉慶字篤之應天人天啓壬戌進士除戶部主事疏言國

計入不敷出歲額缺至二百三十餘萬何以支持旣兵科給事中劉徽請裁驛遞有旨裁十之三省郵傳銀六十萬嘉慶獨曰驛遞之設貧民不能自食者賴之裁之將鋌而走險此盜生之源也俄而李自成以裁驛卒走高迎祥隊中遂致大亂宏光時調吏部文選司擢戶科給事中晚爲僧名函潛又名大然著有靈潭集

孫自修號無修江甯人崇禎甲子舉人知陽江縣有聲遷大同同知亂後遣二愛姬削髮爲蔚麟和尚弟子遊浙中誅茅於人跡罕至之處顏曰懸溪浙人稱爲懸溪和尚

吳有涯字茂申吳江人天啓丁卯舉於鄉崇禎中署金壇教諭遷平陽知縣國變後爲僧隱鄧尉山

薛案字諧孟武進人崇禎辛未進士由教授陞助教轉南京
刑部主事歷郎中出知開封府鼎革後爲僧以己名案也去
冠故去山去髮故去人因姓米氏號米堆山和尚

錢龍錫字稚文華亭人萬歷丁未進士由庶吉士歷官南京
吏部右侍郎忤魏忠賢削籍崇禎帝卽位廷推閣臣金甌枚
卜之首得龍錫拜禮部尙書兼東閣大學士遇事正言多所
所匡救逆案之定半爲龍錫主持姦黨銜之次骨高捷史輩
因袁崇煥得罪連疏詆之逮下獄令長繫四年五月大旱釋
戍定海衛宏光時復官歸里未幾卒

陳濟生字皇士華亭人祭酒仁錫之子以蔭歷官太僕寺丞
北都陷南還著再生記顧倉卒傳聞不盡實也歸田後緝啓

禎兩朝遺詩又命工傳寫有明三百年忠臣義士像裝潢成冊萊州黃培逆詩之獄牽涉濟生啓禎集會濟生已歿得不與禍

李世祺字春生青浦人天啓壬戌進士崇禎三年由行人擢刑科給事中時中官出鎮世祺言魏忠賢盜弄神器賴聖天子翦除之奈何躬蹈之不聽尋以浮雨損山陵昌平地動極陳時弊帝切責之七年正月劾溫體仁絕世之奸大貪之尤謫福建按察司檢校久之起行人累遷太僕寺卿以遣祭魯王旋里國變杜門不出久之卒

史愐金壇舉人崇禎庚辰會試後思宗思破格求才設特用榜自信以下舉人百三十六人許同進士出身愐請援例謁

文廟行釋菜禮并立石太學題名閣臣張四知持不可詔允
情所請是榜死事者戶部郎中金壇徐有聲安平道副使臨
川曾益大學士寶雞楊畏知開封知府武進蔡鳳黃州府同
知宗室朱統錫邳縣知縣安邑李貞佐汾陽知縣西安山陽
劉汝達大同山陰知縣慶陽衛李倬鞏昌安定知縣臨海應
昌士四川嘉定州知州涇縣朱儀興文知縣漢陽艾吾鼎呈
貢知縣鍾祥黃卷十餘人其苦節不仕者則太倉陳瑚崑山
歸莊嘉定徐時勉三人愷官九江知府嘗撰勸餘雜記他無
所聞

李延昱初名彥貞後改今名字辰山上海人年二十走桂林
爲永厯帝某官晚爲道士隱於醫著有崇禎甲申錄南吳舊

話疾革以玩好分贈友朋而儲書二千五百卷則贈秀水朱彝尊彝尊嘗稱辰山生長士族人不知其門閥策名仕版人不知其官資誦其詩知爲徐孝廉閏公之弟子然出處本末終莫得而詳也

方震孺字孩未桐城人移家壽州萬厯癸丑進士以知縣擢御史天啓初疏論客魏事陳拔本塞源論以言挺擊移宮之案直聲震朝廷

大清丘破遼陽一日十三疏請增巡撫通海運調邊兵易司馬且白 師出關弔死扶傷軍民大悅因言三岔河六不可恃疏入命巡按遼東監紀軍事時議者欲退守廣甯震孺請駐振武又請令甯前監軍專斬逃軍逃將並見從而經撫

不和疆事益壞明年正月

大清兵渡三岔河列城奔潰參將祖大壽擁殘兵駐覺華島
震孺慮爲我師所購得也航海見大壽相攜以歸全軍民輜
重無算明年魏忠賢將興大獄嗾給事中郭興治誣以賊私
下獄擬大辟獄卒憐其忠飲啖之得不死崇禎帝嗣位釋還
賊犯壽州長吏適遷秩去震孺倡士民固守城獲全巡撫史
可法上其功起爲廣西參議尋擢巡撫南都初立舉朝敘翊
戴功無意復讎震孺疏言諸臣自高夾日之勳微臣終抱攀
髯之痛願提一旅與賊一決馬士英阻之抑鬱嘔血卒

方孔炤字潛夫桐城人萬厯丙辰進士以知州入爲兵部員
外郎魏忠賢欲封兄子良卿爲伯孔炤執不覆又忤崔呈秀

遂削籍崇禎元年起故官以憂歸定桐城民變十一年以右
僉都御史巡撫湖廣擊賊李萬慶羅汝才於承天八戰八捷
督師熊文燦之納張獻忠降也孔炤條上八議言主撫之誤
陰厲士馬備戰守已而獻忠果叛文燦檄孔炤防荊門當陽
鄭撫王鼐永防江陵遠安孔炤乃請專斷德黃守承天護獻
陵而江漢以南責鼐永會楊嗣昌代文燦令孔炤仍駐當陽
惠王常潤疏言孔炤遇獻忠有來家河神通堡之捷射中賊
魁馬光玉陵寢得毋虞請增秩久任章下部未奏而部將楊
世恩羅安邦奉調會川沅兵勦竹山寇深入至香油坪而敗
嗣昌既以孔炤撫議異己也又忤其言中遂因事劾之逮下
詔獄其子進士以智伏闕訟冤膝行沙堰者兩年帝心動得

減死戍紹興久之薦復官以右僉都御史屯田山東河北馳至濟南命督大名廣平二監司禦寇命甫下而京師陷孔炤南奔給事中羅萬象劾其寇至踉蹌遁又蒙面補官乃歸隱十餘年而終門人私謚曰貞述先生

蔣臣初名姬允更今名字一个桐城人早見知於太倉張采張溥故注名復社崇禎中舉賢良戶部尙書倪元璐薦之召對平臺請行鈔法云歲造三千萬貫一貫值一金歲可得金三十萬兩侍郎王鼐永主其議乃設寶鈔局授臣戶部主事然事實不可行北都陷問道南奔依史可法留參軍務臣歎曰以一騶虞將五狼其能久乎遂辭歸

周岐字農父桐城貢生有聲復社中以貢入京師上書執政

言時事得失馮元颺薦參宣督軍務旋授河南推官參陳潛
夫軍復以按察僉事銜參史可法軍晚又參楊文聰軍死於
浙右其詩歌雄奮與方以智錢秉鐙相伯仲云

鄭三俊字用章池州建德人萬厯戊戌進士由知縣厯擢太
常卿疏讖客氏妖治幾獲罪楊漣之劾魏忠賢也三俊亦極
論之漣等死三俊褫職閒住崇禎元年起南京戶部尙書兼
掌吏部事汰閹黨一空南糧積逋數百萬而兵部增兵不已
三俊祛其虛冒者士得宿飽劾罷蕪湖淮安杭州三關司官
之貪者三人居七年就移吏部流寇大擾江北南都震動屢
陳防禦策禮部侍郎陳子壯下獄疏救之入爲刑部尙書加
太子太保以陰陽愆和請斥諸臣之註誤久繫者內而五城

訊鞠非重辟不必參送法司外而撫按提追非眞犯不必盡解京師刑曹決斷以十日爲期帝皆從之尋以讞侯恂獄不稱旨褫官下吏久之乃許配贖十五年正月復故官代李日宣爲吏部尙書論召對親擢之非舉劉宗周李邦華自代薦黃道周史可法馮元勳陳士奇四人罷不職司官數人銓曹懷懷旣而納周延儒請屬引吳昌時爲文選郎又以昌時言出給事四人御史六人於外科道大譁連章攻昌時并詆三俊乃乞休歸宏光時議起廢吏部尙書張慎言以三俊與吳牲並舉劉孔昭劉澤清阻之乃已阮大鍼之興大悲獄也指三俊與吳牲爲十八羅漢兩人實未出也家居十餘年始卒金光辰字居垣全椒人崇禎戊辰進士由行人擢御史巡視

西城內官周二殺人牒司禮捕之二叩頭御前乞哀帝曰此國法朕不得私卒抵罪按河南條奏至三百餘章九年還朝京師戒嚴光辰分守東直門劾兵部尙書張鳳翼三不可解一大可憂帝以鳳翼方在行間寢其奏又請罷遣中官總監軍務帝怒召對平臺將加重譴而迅雷直震御座風雨聲大作光辰因言臣在河南見皇上撤內臣而喜帝遽曰汝毋復爾怒亦解人謂光辰有天幸云翼日鐫三級調外久之召爲大理寺正進太僕丞十三年五月復偕大臣召對平臺咨禦邊救荒安民之策光辰班最後時已夜獨對燭影中娓娓數百言帝爲聳然尋移尙寶丞陳罷練總換授私派僉報數事歷左通政十五年正月復召對德政殿陳賊形勢帝悅擢左

僉都御史無何以救劉宗周仍鑄三級調外宏光時起故官未赴阮大鍼猶列之十八羅漢中家居二十餘年卒

黃正賓歙人以貲爲舍人直武英殿恥由貲入官思樹奇節萬厯二十年給事中羅大紘言冊立東宮事忤旨奪俸閣臣許國王家屏連名乞收新命而首輔申時行密揭公疏實不與知正賓論時行排陷同官巧避首事之罪帝怒下獄拷訊斥爲民由是見推清議後與李三才顧憲成遊益有聲天啓時起故官遷尙寶少卿汪文言之獄坐贓千金遣戍崇禎元年復故官時聞黨徐大化楊維垣已罷官潛居輦下交通奄寺正賓發其奸命五城御史驅逐歸里宏光時正賓寓居南都已老矣而阮大鍼方用事乃請驅逐以報之

方士亮歙人崇禎辛未進士由推官擢兵科給事中與同官謁大學士謝陞於朝房陞言人主以不用聰明爲高今上太用聰明致天下盡壞又言諸君不必言款事皇上意已決士亮與言官劾陞誹謗漏洩陞遂削籍他所舉劾多見採納周延儒之督師也士亮贊畫軍前延儒敗士亮亦下獄甲申春釋歸宏光時復官久之卒

凌世韶字官球歙人崇禎甲戌進士知甯化縣謫江西按察司簡校改興化府經歷陞處州府推官有廉稱入爲戶部主事國變後棄官隱黃山有納沙草

葉廷秀字潤山濮州人或曰鎮江人天啓乙丑進士由知縣入爲順天府推官英國公張維賢與民爭田廷秀斷歸之民

御史袁宏勛駁勘執如初崇禎中遷南京戶部主事服闋入都疏陳吏治之弊言催科一事正供外有雜派新增外有暗加額辨外有貼助小民破產傾家安得不爲盜賊夫欲救州縣之弊當自監司郡守始保舉之令行已數年而稱職者希覩是連坐法不可不嚴也帝納之授戶部主事以疏救黃道周下獄遣戍廷秀故不識道周冒死論救處之恬然言者相繼論薦十六年冬特旨起故官宏光時兵部侍郎解學龍疏薦內批以僉都御史用馬士英惡之抑授光祿少卿已而阮大鍼張捷相繼內批起用給事中章正宸爭之詔詰以廷秀批升何以寂無一言由是內批盛行廷秀亦以是爲羣小所忌大鍼列之五十三參中南都亡入閩隆武帝授左僉都御

史進兵部右侍郎閩敗爲僧終廷秀受業於劉宗周造詣淵邃及門者稱首亂後著述不傳

成勇字仁有安樂人天啓乙丑進士授饒州推官謁鄒元標於吉水師事之崇禎十年入京考選新例優者得翰林公論首勇而吏部抑之得南京吏部主事明年以言者訟屈授南京御史尋疏論楊嗣昌奪情事有清議不畏名教不畏萬世公議不畏語帝怒削籍訊主使姓名勇獄中上書言十二年外吏數十日南臺無權可招無賄可納不知有黨竟戍甯波衛中外薦者十餘疏不召久之命以他官用甫聞命而都城陷宏光時起御史不赴阮大鍼猶列之五十三參中乃披緇爲僧越十五年以終

范復粹黃縣人萬厯丁未進士由推官入爲御史言毛文龍不可移內地使海外億萬生靈棲身無所又言袁崇煥功在存遼巡按江西言減削郵傳之不便按陝西陳治標治本之策以任將設防留餉爲治標廣屯蠲賦招撫爲治本帝皆納之由大理寺右丞進左少卿未幾超拜禮部左侍郎兼東閣大學士時同命入閣者五人翰林惟方逢年一人餘皆外僚而復粹由少卿尤屬異數累加少保進吏部尙書武英殿尋爲首輔科道劾其才疏學淺復粹亦不安其位遂致仕去國變後卒於家

曹珖初名珍避仁宗諱改今名字用韋益都人萬厯辛丑進士厯官大理卿天啓時以東林削籍崇禎改元起戶部右侍

郎進工部尙書廷議加江西河南山東西田賦十二萬有奇
浙江逋織造銀十餘萬編入正額琬持不可尋中官張彝憲
總理部事將設公座琬與右侍郎高宏圖約俟其至言事竣
撤座去遂相忤請告歸國變後卒於家

袁愷聊城人崇禎十三年官給事中帝之怒薛國觀也以誤
擬旨下五府九卿科道議吏部尙書傅永醇未測帝意擬頗
輕愷會議不署名疏論永醇徇私而微詆國觀藐肆妒嫉國
觀放歸愷再疏發國觀納賄事遂賜死坐追賊給事中朱之
普以是惡愷借事傾之削籍歸宏光時起故官道卒

姜埰字如農萊陽殉節諸生馮里次子也崇禎辛未進士由
知縣入爲禮部主事擢禮科給事中在官五月上三十餘疏

卒以論二十四氣蜚語事與熊開元同下詔獄逮至午門杖一百幾死復繫刑部獄甲申正月謫戍宣州衛乙酉南都亡與弟垓避兵天台魯監國召爲兵部侍郎詔使敦促垓知事不可爲竟不起寓居蘇州嘗奉母歸萊陽我山東巡撫將薦諸

朝乃佯墜馬折股乘間復馳至蘇州自號宣州老兵欲結廬敬亭山不果病革語其子曰敬亭吾戍所也未聞後命吾猶罪人也敢以異代背吾死君哉卒葬宣城子安節字勉中徙家依墓傍卒同人私謚曰孝明

垓字如須瀉里第三子也少與兄垓齊名中崇禎庚辰進士官行人兄垓廷杖斃垓口滿灌之復蘇已聞萊陽之報疏請

代兄繫獄釋塚歸葬其父不許乃馳歸奉母南奔初行人解舍碑有阮大鍼名疏請碎之大鍼切齒及大鍼用事與塚變姓名避之蘇州魯監國召爲考功司郎中大鍼譖之方國安將殺之塚以奉使獲免久之卒

圻馮里長子也馮里四子圻塚塚坡塚有名當時而圻與坡不著崇禎癸未我

大清兵破萊陽馮里一門死者二十餘人坡與焉圻負重傷不死從積骸中負父屍逃浙東監國以貢生謁選授象山知縣時滋陽陽信二王寓居城中江上亂兵蠶起民不聊生二王亦惴惴不自保圻上奉藩府下撫罷兵宛轉周旋悍將間有調護功浙東亡解組北歸抵萊陽以憔悴死南都之追卹

諸臣也。瀉里贈光祿卿諡忠肅。坡贈待詔立祠萊陽道梗不可達。塚又避地不出浙東。禮臣以圻官象山議權立祠其地坡耐焉。

陳奇瑜字玉鉉保德州人。萬厯丙辰進士。天啓二年由知縣擢禮科給事中。嘗疏詆魏忠賢。六年出爲陝西副使。累擢至右僉都御史。巡撫延綏。討斬盜魁。略盡威名。著關陝。於是羣賊走山西。突綏南。又從澠池渡躡河南湖廣。窺四川。乃擢奇瑜兵部右侍郎。總督五省軍務。屢破賊。賊渠李自成張獻忠遁。人興安之。車箱峽蹙之。可盡殲。而奇瑜忽以受降僨事。逮訊。遣戍。事詳明史。初奇瑜官南陽。唐王碩熲殺其世子欲并廢世子之子聿鍵。賴奇瑜力。聿鍵得爲世孫。卽隆武帝也。福

州建號召奇瑜爲東閣大學士道遠未聞命卒於家

丁啓睿永城人萬厯乙未進士由陝西副使厯擢至巡撫用督師楊嗣昌薦擢兵部右侍郎代鄭崇儉總督陝西三邊軍務嗣昌死加兵部尙書改稱督師賜敕卹如嗣昌銜啓睿自副使數遷皆在陝西然實庸才爲督撫奉督師期會謹慎無功及任重專制卽莫知爲計督師期年敗者益大十五年冬十月徵下吏釋歸事詳明史宏光時夤緣馬士英充爲河南事官督河南勸農勦寇諸務以禽斬歸德僞官拜兵部尙書加太子太保官其一子事敗脫身旋里久之卒

李長庚字西卿麻城人萬厯乙未進士授戶部主事厯江西左右布政所在勵清操入爲順天府尹改右副都御史巡撫

山東勤荒政平武定寇盜民賴以蘇四十六年遼東用兵議行登萊海運長庚詳言所歷烏口及陸行剝運遠近部議行之明年特設戶部侍郎一人兼右僉都御史督遼餉駐天津以長庚爲之奏行造淮船通津路議牛車酌海運截幫運議錢法設按臣開事例嚴海防九事又請留金花行改折借稅課以濟軍國急不見聽時諸事創始百務全集長庚悉辦治天啓三年遷戶部尙書以憂歸崇禎初代閔洪學爲吏部尙書監視宣府中官王坤與修撰陳于泰相詆侵及首輔周延儒長庚率同列上言陛下博覽古今曾見內臣參論輔臣者否帝不懌又與溫體仁不合再推郎中王茂學爲知府忤旨斥爲民家居十年國變久之卒

周堪廢字仲聲甯鄉人天啓乙丑進士知永春州以治行行
取陝西道御史厯太僕寺丞光祿少卿順天府尹闖賊陷開
封擢爲工部右侍郎兼副都御史往塞賊所決河堪廢疏言
河之大勢盡歸於東運道已通陵園無恙疏甫上而決口再
潰闖賊亦棄開封別由上游偷渡窺潼關堪廢疏請急扼宣
雲關隘未報而尙書命下遂乞骸骨歸宏光時再申前命堪
廢知不可爲乃變姓名轉徙閩海嶺表間久之歸里焚香禮
佛鄉人罕識其面永厯時再以尙書召亦不出卒年六十三
子鉉隆武丙戌舉人後死於賊

文士昂字台仙攸人天啓壬戌進士授華陽知縣擢工科給
事中出爲威茂道升雲南布政使晉太僕寺卿士昂負經濟

才初知華陽教民築陂作筒車大興水利遷工科時河陝大饑疏飭撫臣發賑無拘常例又力陳中官監軍之弊不見用乞假歸亂後佯狂山谷以終

陳所聞字印水茶陵人崇禎中拔貢初官崇信知縣有政聲陞署固原州南渡後起知江夏縣行取御史戊巳以後天下大定棄官歸隱山居二十年

羅其鼎字耳臣桃源人崇禎庚辰進士官行人性篤孝母喪值鄉試不預含殮終身不食肉衣帛鼎革後隱居不出卒門人私謚曰貞易先生

陳五聚字史占崇禎時副榜仕至監軍鼎革後歸隱築室曰茅窩海內冥鴻之士多歸之又羅楨者隱居衡山工騎射善

劍術嶺南何不偕陳恭尹嘗主其家

張聖型字子疇聖域字定遠新化人兄弟有異才著述甚富
聖型官連山知縣聖域官萬安知縣鼎革後歸隱洪承疇遣
材官車鼎英徵之不赴結茅嚴塘不入城市者二十餘年
米助國字民和辰溪人天啓乙丑進士官江西龍泉知縣撫
按下議建魏瑞生祠執不可瑞敗朝廷徵立祠罪江右獨無
龍泉力也擢御史出尙書畢自嚴給事中章正宸於獄竟以
是落職甲申後避亂東山減食飲卒子肇灝貢生孫元偶舉
人皆守志以布衣終又有余鵬翔者亦辰溪人助國同年進
士官金谿知縣捕盜有聲厯擢山東按察副使後崎嶇滇黔
間以悲憤死

于斯力湖廣人崇禎末舉人性嚴正不阿由教諭擢戶部主事甲申之變有九章歌悲憤淋漓後以他累瘐死

郭都賢字天門益陽人天啓壬戌進士歷官江西巡撫賊陷吉安袁州被議棄官入廬山宏光時史可法薦授南京操江不赴可法故都賢會試分校所得士也丁亥二月永曆帝以兵部尚書召都賢已祝髮浮邱山號頑石又號些菴茹苦行腳流寓沔陽洪承疇之革職也都賢奏請起用承疇德之後歸我

朝經略西南謁都賢於山中餽金不受請以其子爲監軍亦不許都賢博學精畫繪尤工詩多爲鄉人所傳然竟以詩累客死江陵之承天寺

文煥字木生華容人崇禎庚午舉人授四川南部知縣未一月賊至誘之降煥書諸葛未亡猶是漢伯夷雖死不從周二語於官廨鼎革後崎嶇滇黔間累官至太常卿已黃冠歸里我經略洪承疇薦起之謝以詩承疇知不可強禮歸之終於家

陶汝熊字仲調甯鄉人幼慧甫龀應童子試學使者驚爲異才取冠湖南數郡崇禎元年拔貢帝幸太學廷臣請復高皇帝積分法特賜汝熊第一詔題名太學以五品官秩留監肄業癸酉舉於鄉兩中會試副榜官廣東新會教諭南渡後由翰林院待詔改兵部職方司郎中復授檢討監五省軍捍禦鄉邦有力旋祝髮號忍頭陀著有榮木堂集弟汝熊字幼調

獻賊僞檄舉名士汝肅與汝預子之典名最著汝肅曰兄止此子吾有三子不憂死乃佯應命而蠟書乞師於江西巡撫郭都賢不得達竟死虔州

劉瑄字他山澧州人崇禎庚辰進士官檢討丁母憂歸流賊陷澧奉父避慈利聞北都之變嚙指血作書託弟終養老父將自盡家人羅守之父泣喻乃止父歿入衡山爲僧

楊山松字長蒼武陵人督師楊嗣昌之長子也以祖鶴蔭錦衣衛指揮行軍監紀同知幼隨父軍中綜覈軍實章奏皆出其手目光如電軍中號爲楊家小飛將山梓字仲丹以父蔭官職方主事山樛字季元襲錦衣衛百戶嗣昌負罪歿詆之者比之溫體仁山松撰孤兒籲天錄山梓撰辨謗錄冀雪父

冤流寇陷常德家屬殉難兄弟募勇復讎賊令擒楊氏一人
者予千金山樛爲一卒所得縛至城南之龍溪漁人伍立突
出大呼曰楊氏何負於汝梃樊縛者得免康熙時吳三桂之
變訪楊氏子孫授僞職山松遁之江南號忍古頭陀顧炎武
詩曰督師公子竟頭陀詩筆崢嶸浩氣多兩世心情知不遂
待誰更奮魯陽戈

賀奇字庸也武陵人以拔貢授中書舍人加兵部職方主事
監察御史鼎革後祝髮峩峩帽隱滇黔間二十年我當事強加
巾服具題以原官用不赴

潘應斗字章辰武岡人崇禎癸未進士南都立陳時政爲阮
大鍼所扼授廣東萬州知州永曆帝之建國肇慶也授御史

改吏部郎中尋加太常寺卿見劉承胤亂政度不能抗乃棄官去與弟禮部主事應星誅茅威溪之麓著述唱和饗殮不給晏如也應星字夢白嘗封股愈父疾人稱孝焉

管嗣裘字治仲衡陽人崇禎壬午舉人父大成官御史獻賊陷衡州嗣裘跳走嶺外依桂王粵中建號授中書舍人以抗直罷居桂林之靈巖洞衣敗絮與猺獠雜處獠人義而餉之不知所終同時有鄒統魯字大繫鄆人以拔貢中壬午舉人衡州陷時承父命乞師於粵督沈猶龍導粵兵復郴衡各郡永曆帝立授中書舍人後隱祁陽山中所在載書十數麓以從

男承禮編輯

仁和魏錫曾參校
會稽梁繼元覆校

小腆紀傳卷第五十六終